



阿和伯姆个怨嘆

又在(do)該講哩啲！你看阿和伯姆企到該怕有完點鐘，同阿文哥毋知在該講麼个？實在還服佢哪！八十零歲吔，還做得企恁久著，毋會疼，同人恁有話好講！

阿和伯姆，外家原旦係斗換坪个旺族，係屋下个滿女，屋下人个命肝團、掌上明珠。人講滿女滿嬌嬌，阿和伯姆試著一息就毋會差！做細人仔時節，在屋下，愛食麼个、愛用麼个就有麼个！厥爸厥姆、阿哥阿姊一屋下人都當惜佢。十過歲仔，就識同厥婆坐火車過花蓮，去看在花蓮港上班个阿姊。做細妹仔時節，當多人想愛同佢做媒人，當多人來講親。哪知嫁來葉屋，苦日仔就跟等來！

毋係老公生來緣投、老實，送佢就無愛嫁來南庄哦！阿和伯姆講，佢二十歲對斗換坪嫁來葉屋，已經超過六十年。自到葉屋，一屋下个事頭全全落到厥肩頭項。大家庭兩十零儕，三餐个飯菜愛煮，樵愛撿、杈仔愛繫；愛洗歸屋下人个碗筷、洗幾下腳盆个衫褲，還愛種菜、淋菜、摘菜、畜頭牲仔……，正經辛苦、無人知哦！還記得正嫁來葉屋該下，小郎叔還言出世，等到佢降大个俵仔，小郎叔正降，佢做月仔、厥家娘也做月仔。該央時，連愛食一碗雞酒就難哦！哪有恁多米國時間好好來補身體、做月仔？

阿和伯姆講，佢降五個俵仔，全部自家渡，還愛搵手渡小郎叔！等到自家个細人仔愛去學校讀書時節，佢就煞煞去外背尋頭路做。係無，老公攞人做西裝个月給錢，全部愛分家娘管，細人仔个註冊錢愛尋麼人拿？好得！阿和伯姆有上班，有班好加就加班，正有錢繳自家个俵仔讀到高中畢業，恁樣，儕儕正尋得著頭路做。五個俵仔後來結婚个錢、買屋仔个錢，佢也有搵手著！這件事情，阿和伯姆一直就當記得。

阿和伯姆自家渡大五個細人仔，五個細人仔逐個就成家立業，儕儕都順順序序過生活！毋知阿和伯姆做麼个還愛同隔壁鄰舍、親戚朋友、自家俵仔个朋友，緊講頭擺，嫁來南庄一路里來个辛苦、衰過摻冤枉。

這，大家就知、都了解个故事。毋知，阿文哥係毋係恁堵好又聽加一擺咧！

作者：邱一帆

☆詞彙學習☆

【怕有】pa iuˊ：恐怕有，猜測語氣。

【命肝團】miang gonˊ tonˊ：心肝寶貝。

【完點鐘】vonˊ diamˊ zungˊ：接近一小時。

【跟等來】gienˊ denˊ loiˊ：接踵而來。

【還服佢】hanˊ fug giˊ：很佩服他。

【米國時間】miˊ guedˊ siiˊ gienˊ：比喻閒暇時間。

【斗換坪】deuˊ von piangˊ：原漢交易的山坪，現屬苗栗縣頭份市境內。

【恁堵好】anˊ duˊ hoˊ：正剛好。